

Bibel fa Kjinja
brinjt junt

Jona un de Groota Fesch



Jeschräwen von: Edward Hughes

Jemolt von: Jonathan Hay

Toom Pauss jestalt von: Mary-Anne S.

Äwasat von: Ed Zacharias

Hääjestalt von: Bible for Children
www.M1914.org

©2020 Bible for Children, Inc.

Jesazlich: Du doascht dise Jeschicht oppnämen ooda drekjen,
soo lang aus du dee nich vekjafst.




Lang trigj läwd doa een Maun,
Jona, en Israel. Een Dach säd
Gott, Jona sull no
Ninive gonen.




Ninive was eene groote Staut met
eenen grooten Kjennich. Jona sull
de Lied sajen daut Gott
wist woo schlaecht
see wieren.



Jona jehorcht Gott nich! Enne
Städ daut hee no Ninive jinkj,
stieech hee en een Schepp daut
am no Tarsis naum. Daut wia
noch wiet auf von Ninive.




De HAR Gott schekjt eenen stoakjen Storm-Wint
oppem Mäa nopp. De Seemana enjst, daut daut
Schepp zwei-bräakjen un unjagonen wudd.



De Storm wort eegol schlemma. Gauns ve-enjst
bäden de Seemana jieda äaren Gott aun. See
schmeeten de Fracht em Mäa toom
daut Schepp leichta moaken;
oba daut holp nuscht.



Bloos Jona deed nich bäden. Hee haud sikj doljelajcht un schleep. De Kapitän funk am, un säd, "Wuarom schlapst du? Sto opp, un bäd dienen Gott aun. Veleicht denkjt hee aun ons un halpt daut wie nich unja-gonen."



De Seemana wullen
nich Jona em Wota
schmieten. See
roodelden sea toom
nom Launt komen;
oba see kunnen
daut nich. Doa
wia bloos een
Rot!




Ieescht bäden de Seemana,
daut Gott an
daut vejäwen
sull, un dan
schmeeten
see am em Mäa.
Aus Jona en de Walen
veschwunk, veschwunk uk de
Wint un daut Mäa wort stell.
Dit wundad de Seemana
sea. Bloos Gott kunn
soont doonen. See
hauden Forcht fa
däm HARN un
bäden am aun.



Oba de onjehuarsoma
Jona must sikj uk
wundren. Hee
docht daut hee
wudd vedrinkjen
motten. Daut
wudd uk
jeworden
sennen
wan Gott
nich eenen
aundren Plon
jehaut haud.



De HAR haud eenen grooten Fesch
jebrocht toom Jona oppschlucken.
Nu wia dee doa, un Jona wia boolt
em Fesch sien Buck. Hee wia doa
fa dree Doag. Hee haud Tiet
toom denkjen un bäden.
Väl Tiet.



En de dree Doag wort Jona wellich Gott
jehuarsom to sennen. Doamet leet Gott däm
Fesch Jona oppbrinjen, oppem Launt nopp.



Gott räd wada to Jona, un säd hee sull no
Ninive gonen un prädjen. Ditmol jinkj Jona.
Aus hee enne Staut nenn kjeem säd
hee, "Noch 40 Doag un dan woat
dise Staut venicht
woaren."



De Menschen en Ninive jleewden Gott sien Wuat.
See eeten een poa Doag nuscht un druagen Sak-
kjeleeda, wiels an äare Sind soo leet wia. Uk de
Kjennich kjneed ver Gott. Hee veleet sien Troon,
druach Sakkjeleeda un saut em Aussch. Hee velangd
daut aule Menschen daut
schlajchte oppjäwen
sullen. See sullen
bäden daut Gott
an vejäwen wudd.



Gott DEED an vejäwen! Daut muak de Lied
en Ninive sea jlekljlich. Gott haud
an vejäft. ... Oba

een Maun
wia sea
doll. Daut
wia Jona.



Wuarom wia Jona doll?
Hee säd to Gott, "Ekj wist
du wiescht sea jenstich
un deetst die leicht
erboarmen." Jona haud
jewist daut Gott vejeeft
dee, waut äare Sind leet
wia, un Gott sien Wuat
jehorchten. Jona haud
waut jaaen Ninive; hee
wull haben daut see
nich vejäft sullen.



Jona wia soo doll äwa Gott, hee säd, "Ekj sie saut vom Läwen. Lot mie doch stoawen."




Jona sad sikj buta de Staut dol toom seenen waut
Gott met Ninive doonen wudd. De HAR leet
eene Plaunt met groote Bläda
waussen. Dee kjeem
bosich opp un jeef
Jona Schauten von
de heete Sonn.



Dän näakjsten Morjen leet Gott een Worm komen
un de Plaunt doot moaken. Dan kjeem een heeta
drieeja Wint, soo daut Jona docht daut hee
stoawen wudd. Jona wort noch dolla.




De HAR säd to Jona,
"Waut halpt die daut,
die soo to oajren.



Die es daut schod äwa eene Plaunt, fa
dee du nuscht jedonen hast, un dee
du nich daut Läwen jeefst, eene
Plaunt dee eene Nacht doa wia,
un de näakjste wajch wia.
Woo sull mie daut

nich äwa
de Staut
Ninive schod
sennen."



Jona un de Groota Fesch

Eene Jeschicht von en daut Wuat Gottes,
de Bibel

finjt eena en

Jona

"Wan dien Wuat openboat woat,
jefst daut Licht." Psalm 119:130



Daut Enj



Dise Biblische Jeschicht sajcht ons von onsen wundascheenen
Gott, see ons jemoakt haft un ons well kjanenlieren.

Gott weet daut wie schlaichtet jedonen haben, waut hee Sind
nant. De Strof fa Sind es de Doot, oba Gott siene Leew fa ons es
soo groot, daut hee sienen eensjen Sän, Jesus, schekjt, daut hee
aum Kjriez stoawen sull un de Strof fa onse Sind nämen sull. Dan
stunt Jesus vom Doot opp, un fua no sien Tus em Himmel! Wan du
dän Gloowen aun Jesus hast, un am frajchst diene Sind to
vejäwen, dan deit hee daut! Hee kjemt dan un läft en die, un du
woascht opp emma met am läwen.

Wan du dit jleewen kaust, dan saj to Gott:
Leewa Jesus, ekj jleew daut du Gott best, un worscht een Mensch
toom fa onse Sind to stoawen, un daut du nu wada läfst. Komm en
mien Läwen un vejeff mie miene Sinden, soo daut ekj nu nieet
Läwen haben kaun, un noch emol opp emma no die kom. Halp mie
daut ekj die jehuarsom sie, un fa die läw aus dien Kjint. Amen.

Lass de Bibel un räd jieda Dach met Gott! Joh. 3:16

